

Հ Հ Արագածոտնի մարզպետի ժամանակավոր պաշտոնակատար Մուշեղ Աբգարյանի շնորհավորական ուղերձը Հանրապետության օրվա առթիվ

Սիրելի՛ հայրենակիցներ, շնորհավորում եմ բոլորիս՝ Հանրապետության օրվա կապակցությամբ:

Այսօր տոն է Հայոց աշխարհում: Մեծագույն հպարտությամբ ու ոգետրությամբ մենք նշում ենք Հայաստանի առաջին Հանրապետության հռչակման 100 ամյակը եւ Մայիսյան հերոսական հաղթանակների տոնը: Հաղթանակներ, որոնք սկիզբ են առել Ավարայրի ճակատամարտից եւ շարունակվել ու հասել մինչեւ Ղարաքիլիսա, Բաշ-Ապարան եւ, ի վերջո՝ Սարդարապատ:

1918 թվականի մայիսի 28-ին հռչակվեց անկախ Հայաստանի Հանրապետությունը, որը ճակատագրական նշանակություն ունեցավ մեր հայրենիքի համար: Այդ պատմական իրադարձությամբ իրականություն դարձավ մեր պապերի դարավոր երազանքը՝ ունենալ ազատ եւ անկախ Հայաստան:

Նշանակալից այս տոնը խորհրդանշում է պայքարի բազում ուղիներ անցած եւ այդ ճանապարհին կարեւորագույն հաղթանակներ ունեցած հայ ժողովրդի պետականության կերտման եւ պահպանման մեծագույն կամեցողությունն ու արժանապատիվ ապրելու ձգտումը:

Հայ ժողովրդի Մայիսյան հաղթանակների երթն իր շարունակությունն ունեցավ մեր օրերում՝ Արցախյան հերոսամարտում, որի ռազմական հաղթականարը դարձավ Շուշիի ազատագրումը: Մեր ժողովրդի միասնականության փառահեղ ոգին, երիտասարդ հայորդիների հայրենապաշտության ու հայրենասիրության անգերազանցելի զգացողությունը մեկ անգամ եւս դրսևորվեց Ապրիլյան քառօրյա պատերազմում:

Սիրելի՛ հայրենակիցներ, վերստին շնորհավորում եմ բոլորիս Հայաստանի Առաջին Հանրապետության օրվա կապակցությամբ: Թո՛ղ որ հարատեւ եւ անկասելի լինի անկախության մեր այս երթը, եւ թո՛ղ որ հավերժ խաղաղություն տիրի Հայոց աշխարհում: